

Անձնական և կրթական ուղի

Ես Աննա Սիրադեղյանն եմ: Ծնվել և մեծացել եմ Տավուշի մարզի Սևքար գյուղում: Դեռ մանկուց ինձ հաճախ եմ զգացել հասակակիցներիսից տարբերվող՝ թե՛ արտաքինով, թե՛ բնավորությամբ: Ունեմ հազվադեպ հանդիպող հիվանդություն՝ Մոբիուսի սինդրոմ, որն արտահայտվում է դեմքի ասիմետրիայով և տեսողության հետ կապված խնդիրներով: Երբ փոքր էի, հաճախ էի ինքս ինձ հարցնում՝ ինչո՞ւ եմ ես ուրիշ, ինչո՞ւ եմ մարդիկ ինձ երբեմն կարեկցանքով նայում, և ինչո՞ւ եմ տարբերվում մյուսներից: Այդ հարցերը երկար ժամանակ ուղեկցում էին ինձ: Սակայն տարիների ընթացքում այն, ինչ սկզբում ընկալում էի որպես իմ թուլություն, դարձավ իմ ուժի աղբյուր: Ես սովորեցի չսահմանափակվել մարդկանց հայացքներով ու կարծիքներով, այլ սեփական արժեքը տեսնել իմ արարքների, ձգտումների և ձեռքբերումների մեջ: Հենց այդ ճանապարհին էլ ձևավորվեցին իմ բնավորությունն ու կամքի ուժը: Գուցե հենց այս փորձն էլ դարձավ բժշկության ճանապարհն ընտրելու առաջին և ամենախորքային պատճառներից մեկը: Ես ցանկանում էի ավելի լավ հասկանալ իմ և ինձ նման մարդկանց խնդիրները, իսկ հետագայում՝ կարողանալ օգնել նրանց: Ցանկանում էի, որ այն մարդը, ով առողջական կամ արտաքին առանձնահատկությունների պատճառով իրեն տարբեր է զգում, չհանդիպի միայն կարեկցանքի, այլ ստանա նաև մասնագիտական աջակցություն, հասկացված լինելու և ինքնավստահություն ձեռք բերելու հնարավորություն: Դեռ փոքր տարիքից որոշել էի, որ մարդկանց կարծիքը չպետք է որոշի իմ ապագան: Ես ընտրեցի սովորելու ճանապարհը՝ հավատալով, որ կրթությունն ինձ համար լինելու է ոչ միայն մասնագիտություն ձեռք բերելու, այլև որպես մարդ ձևավորվելու ամենակարևոր միջոցներից մեկը: Հավատում էի, որ գիտելիքը կարող է մարդուն դարձնել ավելի ուժեղ, ինքնուրույն և գիտակից, իսկ լավ կրթությունը՝ օգնել սեփական ճանապարհը կերտել անկախ հանգամանքներից: Դպրոցական տարիների ընթացքում սկսեցին իմ առաջին հաջողությունները: Մասնակցում էի տարբեր առարկայական օլիմպիադաների, ձգտում էի սովորել ավելի շատ և ավելի լավ: Յուրաքանչյուր ձեռքբերում ինձ համար պարգապես գնահատական կամ մրցանակ չէր. այն ապացույցն էր, որ ես կարող եմ հաղթահարել իմ առջև դրված սահմանափակումներն ու վստահորեն առաջ շարժվել: Ժամանակի ընթացքում փոխվեց նաև շրջապատիս վերաբերմունքն իմ նկատմամբ: Այն հայացքները, որոնցում երբեմն կար կարեկցանք, աստիճանաբար փոխարինվեցին հարգանքով և հիացմունքով: Այդ փոփոխությունն ինձ կարևոր մի բան սովորեցրեց. մարդուն չի կարելի գնահատել նրա արտաքինի հիման վրա: Մարդու իրական արժեքը բացահայտվում է նրա վերաբերմունքի, կատարած գործերի, նպատակների և այն բարության մեջ, որը նա կարողանում է փոխանցել ուրիշներին: Ինձ համար հատկապես կարևոր է եղել նաև այն գիտակցումը, որ սեփական դժվարությունները հաղթահարելն արժեքավոր է, բայց ուրիշների դժվարությունների հանդեպ անտարբեր չլինելը՝ առավել կարևոր: Մարդկանց օգնելու, նրանց ցավը հասկանալու և հնարավորության սահմաններում նրանց կողքին լինելու ցանկությունն իմ մեջ ձևավորվել է դեռ մանկուց: Ես հավատում եմ, որ յուրաքանչյուր մարդ կոչված է բարին գործելու, և այդ համոզմունքն ինձ ուղեկցում է մինչ օրս: Այսօր, հետո նայելով իմ անցած ճանապարհին, հասկանում եմ, որ այն, ինչ ժամանակին ինձ ստիպում էր հարցնել՝ «ինչո՞ւ եմ ես ուրիշ», ի վերջո դարձավ այն ուժը, որն օգնեց ինձ հասկանալ՝ ով եմ ես և ինչ եմ ուզում անել իմ կյանքում: Իմ տարբերությունը դարձավ իմ ուժը, դժվարությունները՝ իմ փորձը, իսկ մարդկանց օգնելու ցանկությունը՝ իմ կյանքի կարևորագույն նպատակներից մեկը: Հենց այդ արժեքներով էլ ես ընտրեցի բժշկությունը՝ մի մասնագիտություն, որի հիմքում, իմ համոզմամբ, միայն գիտելիքն ու հմտությունը չեն: Բժիշկ լինել նշանակում է նաև կարողանալ լսել, հասկանալ, կարեկցել և մարդուն ուժ տալ այն պահին, երբ նա դրա կարիքն ամենից շատ ունի:

Դպրոցական վերջին տարիների ընթացքում ավելի ու ավելի էի համոզվում, որ ցանկանում եմ բժիշկ դառնալ: Ես ուզում էի ոչ միայն օգնել ու բուժել ինձ և ինձ նման մարդկանց, այլև իմ գիտելիքներն ու կարողությունները ծառայեցնել բժշկական օգնության կարիք ունեցող այլ մարդկանց: Մինչև 19 տարեկանը ուզում էի դառնալ պլաստիկ վիրաբույժ և միկրովիրաբույժ՝ հետագայում իմ հիվանդության հետ կապված խնդիրները հաղթահարելու և նմանատիպ դժվարությունների առջև կանգնած մարդկանց օգնելու համար: Սակայն 19 տարեկանում սկսեցի լրջորեն մտածել նաև ուռուցքաբանության մասին: Այս ընտրության վրա մեծ ազդեցություն ունեցավ իմ ընտանիքի անձնական փորձը: Ինձ համար ամենաթանկ մարդկանցից մեկը՝ տատիկս, կյանքից հեռացավ քաղցկեղի պատճառով: Նրա կորուստը խորը հետք թողեց և ստիպեց ավելի խորը մտածել այն մասին, թե ինչպես կարող եմ ապագայում իմ

մասնագիտությամբ օգնել մարդկանց պայքարել այդ հիվանդության դեմ: Մինչև դպրոցն ավարտելն իմ առջև ձևավորվել էր բժշկության երկու կարևոր ուղղությունների միջև ընտրության երկընտրանք՝ պլաստիկ վիրաբուժություն և միկրովիրաբուժություն, թե՞ ուռուցքաբանություն: Երկու ուղղություններն էլ ինձ համար պարզապես մասնագիտություններ չէին. դրանք իմ անձնական փորձից, ապրումներից և մարդկանց օգնելու անկեղծ ցանկությունից ծնված նպատակներ էին: 2018 թվականին ավարտեցի Սևքարի միջնակարգ դպրոցը՝ արդեն հստակ գիտակցելով, որ ցանկանում եմ իմ հետագա կյանքը նվիրել բժշկությանը և մարդկանց օգնելու գործին:Գյուղից Երևան տեղափոխվելը հեշտ չէր՝ հատկապես ֆինանսական և սոցիալական դժվարությունների պատճառով, սակայն այդ պայմանները երբեք չեն թուլացրել իմ վճռականությունը և կամքի ուժը: Ներկայումս վարձով բնակվում եմ Երևանում համատեղության կարգով՝ եղբորս հետ: Լինելով միակողմանի ծնողազուրկ՝ վաղ տարիքից սովորել եմ պատասխանատվություն կրել իմ ընտրությունների և ապագայիս համար, ինչը ձևավորել է իմ աշխատասիրությունն ու կամքի ուժը: Ինձ ոգեշնչող մարդկանցից էին մայրիկս, եղբայրս, պապիկս, որոնք և՛ դժվար, և՛ ուրախ պահերին միշտ իմ կողքին էին և ոգևորում էին ինձ: Ընդունվելով Մխիթար Հերացու անվան պետական բժշկական համալսարան վճարովի հիմունքներով՝ ուսման առաջին տարվա ավարտին իմ աշխատասիրության և բարձր առաջադիմության շնորհիվ տեղափոխվեցի անվճար համակարգ և մինչև 6-րդ կուրսի ավարտ ուսումս շարունակեցի անվճար հիմունքներով: Համալսարանական տարիներին ակտիվորեն ներգրավված եմ եղել կամավորական գործունեության մեջ՝ ինչպես համալսարանում, այնպես էլ բժշկական տարբեր կազմակերպություններում, ինչը էլ ավելի է ամրապնդել իմ մասնագիտական կողմնորոշումը: Սակայն, ավարտելով հիմնական բժշկական կրթությունս և երկար մտորելով, ես ընտրեցի նյարդաբանություն ուղղությունը: Կրկին անդրադառնալով իմ նեղ մասնագիտության ընտրությանը՝ չեմ կարող չնշել 2020 թվականի արցախյան պատերազմի մասին: Պատերազմը իր հետքը թողեց բոլորիս վրա: Վերջին 6 տարիներին հասարակության մեջ լայն տարածում գտան հետպատերազմյա նյարդաբանական և հոգեբանական խնդիրները, որոնց բախվում են ոչ միայն պատերազմի մասնակիցները, այլ նաև նրանց ընտանիքի անդամները և մենք բոլորս: Ես հասկանում եմ այդ մարդկանց, որովհետև այդ խնդիրներին առնչվում էի ոչ միայն հեռվից դիտելով, այլ նաև ընտանիքում՝ եղբորս հետպատերազմյա ապրումները տեսնելով: 2024 թվականին ընդունվել եմ ԵՊԲՀ-ի կլինիկական օրդինատուրա նյարդաբանություն մասնագիտությամբ վճարովի հիմունքներով: Ֆինանսական սահմանափակումների պատճառով ուսումս շարունակել եմ Առողջապահության նախարարության նպատակային ծրագրի շրջանակում, որի համաձայն պարտավորվում եմ ավարտելուց հետո աշխատել մարզում՝ որպես բժիշկ 3 տարի ժամկետով: Կարծում եմ ՀՀ մարզերում մարդիկ իրավունք ունեն ստանալ որակյալ բուժօգնություն անկախ իրենց բնակության վայրից: Կլին. օրդինատուրայի 1-ին տարվա ուսման վարձը՝ 650.000 դրամ, այնուամենայնիվ, պետք է մոռնեմ մինչև կլինիկական օրդինատուրայի ավարտը: Ներկայումս ուսմանս հետ մեկտեղ աշխատում եմ Երևանի 1-03 շտապ բժշկական օգնության ծառայությունում, որտեղ ամեն հերթապահություն ինձ ավելի է համոզում, որ ճիշտ մասնագիտություն եմ ընտրել: Մարդկանց լսելը, նրանց օգնելը և կյանքեր փրկելը ինձ համար ոչ միայն աշխատանք է, այլև առաքելություն:

Ցանկանում եմ իմ խորին շնորհակալությունը հայտնել SOAR կազմակերպությանը, և հատկապես՝ SOAR Jacksonville համայնքին, այս կարևոր և ոգեշնչող նախաձեռնության համար: SOAR Jacksonville-ի կրթաթոշակային ծրագիրը հրաշալի հնարավորություն է ծնողազուրկ ուսանողների և աշակերտների համար: Նոր միջավայրում և նոր քաղաքում իրենց կյանքը շարունակող երիտասարդները հաճախ ստիպված են հաղթահարել բազմաթիվ սոցիալական և ֆինանսական դժվարություններ: Այդպիսի պայմաններում կրթական աջակցությունը ոչ միայն կարևոր օգնություն է, այլև վստահության, հույսի և նոր հնարավորությունների աղբյուր: Ես նույնպես դիմել էի այս ծրագրին՝ գիտակցելով, որ ամբողջությամբ չեմ համապատասխանում ծրագրի սահմանված չափանիշներին: Այնուամենայնիվ, ինձ հնարավորություն տրվեց մասնակցելու հարցազրույցի: Կազմակերպիչները մեծ ուշադրությամբ լսեցին իմ պատմությունը, հասկացան իմ անցած ճանապարհը և իրենց ջերմ ու անկեղծ խոսքերով մեծապես ոգևորեցին ինձ: Այդ հանդիպումն ինձ համար արժեքավոր էր հատկապես մարդկային ջերմության և աջակցության առումով: Հատուկ շնորհակալություն եմ ցանկանում հայտնել նաև իմ հայտը դիտարկելու և այն SOAR Global ծրագրին ներկայացնելու համար: Ինձ համար մեծ նշանակություն ունի այն փաստը, որ իմ պատմությունը լսվեց, ես արժանացա ուշադրության և հնարավորություն ստացա ներկայացնել իմ պատմությունն ավելի մեծ լսարանի:

Շնորհակալ եմ SOAR-ին և SOAR Jacksonville համայնքին՝ իրենց կատարած կարևոր աշխատանքի և հոգատար վերաբերմունքի համար: